



Selasa, 8 Maret 2022
Ogen: Esekiel 32:17-32



Seri Nasibna



La lit si kekal bas doni enda. Kerina kerira ras masap nge pagidungna. Kalak si la erpengangkan iakapna maka kebayaken, kesehaten, kejayaan banci tetap tahan rasa lalap. Deba simbiar kel ia kerira kesahna idaramina lalap dalam gelah banci panjang umurna, berita si terbaru maka lit kalak nggo isewaina sada tabung si jadi "ingan pengadi-ngadin"na sementara. Tabung enda ingan membekuken kulana adina ia enggo nandangi mate. Iarapkenna maka tahun 2200 awet denga kari dagingna e, gelah banci ipeke alu teknologi si pasti enggo reh majuna bas masa e. Em sinuduhkan manusia ras kepentarena megati ndarami dalam melawan kodrat ras ketentun Dibata.

Enda bali kel bagi pengakap Mesir kerna dirina ras Dibata. Kesombongen ras kuasa kemanusianna ibahanna guna mpeteruk Tuhan. I bas ogenta enda ituduhkan Tuhan maka kerina semarak ras keagungen Mesir enda labo lit ertina ibas Tuhan. Kematen Mesir ras kerina raja ras puanglimana si mbisa e, labo hagan asangkan kematen rakyat Assyur, Elam, Edom, Mesekh ras Tubal si nggo leben ikernepen Dibata. Kerina bangsa e bangsa-bangsa si mbelin, si megegeh tapi alu menukah kerina ikernepeken Tuhan, apai ka sada Mesir ngenca. Seri krina nasibna bangsa si la malang man Tuhan.

Kerina pasu-pasu siibereken Tuhan man banta, titipen nge ngenca. Pernah nge sisungkun Tuhan engkai maka kita iberekenNa geluh si senang ras dem pasu-pasu? Tentuna labo gelah meganjang ukuta, tapi guna ngelai Ia, mpehaga gelarna. Ndaulah i bas kita biak meganjang ukur, ola padah siagahkan kiniliteken ras kuasata bas doni enda, tapi mpeteruklah banta. Si Lit bas ia mbue, ipakekenna lah e guna mpekena-kena doni enda.